

# JONAS

**1** Ane Jehova a nga kobô Jonas mon Amitthaï, a jô na, 2 Kôlô'ô si, ô ke Ninive, beta nlam ate, a lepe wô ; amu mbia be mam map ma kuiya be ma. 2 Ve Jonas a nga kôlô a mate a ke si Tarsis a kolô vôm Jehova a to. ; ane a nga ke Japho, ane a nga yene miele mi kele' Tarsis ; nalé a nga ke ya'ane tañe ya été, a fubu été, ane ba be be be nga ye ke Tarsis a kolô vôm Jehova a to.

4 Ve Jehova a nga lôme beta évuñulu mañe yôp, ane beta ôkôs a nga bo mañe yôp, ane miel mi nga bo ane mi aye bôlé. 5 Ane bôt ya miel be nga ko woñ, a loene môť ase zambe wé ; ane be nga wua biôm bi nga to miel été ôsôé, ô be be éveves. Ve Jonas a nga ke mfa'a ya asusu'a miele si ; a bômbô si, a dañe ke ôyo. 6 Ane mie miele a nga zu vôm a nga to, a jô nye na, A nke ôyo, w'asimesane aya ? Kôlô'ô si, a lo'ene Zambe wôé, ndô'ôtô Zambe a ye simesane bia, ane bi aye bo te jañ. 7 Ane môť ase a nga jô nyô mbo'o na, Za'a bi bo asimba, bi bo ngule ya yeme na, mbia jam a zu be bia nyô ane ajô za. Nalé ate be nga bo asimba, ane asimba é nga liti Jonas. 8 Ane be nga jô nye na, Bi aye'elane wo na, kate'e bia, mbia jam a zu be bia nyô ane ajô za ? w'abo za ésaé ? a wo so ke vé ? ô to za sii, ô ne ke mone ya za ayoñe ? 9 Ane a nga jo be na, Me ne mone Hébreu ; a m'ako Jehova woñ, Zambe ya yôp, nyô a nga bo mañ a kindik. 10 Eyoñ éte be nga dañe ko woñ, a jô nye na, Za jam ô nga bo di ? Amu bôte bete be nga yeme na, a nga mate Jehova, amu a kateya be nalé.

11 Ane be nga jô nye ne, bi aye bo wo aya, ane mañ me bo bia mvo'é ? amu ôkôse ya mañ ô nga nenenen. 12 Ane a nga jô be na, Beta'ane ma, a wua ma mañ été ; nalé mañ m'aye bo mia mvo'é ; amu m'ayeme na beta ôkôse nyô a zu be mia amu ma. 13 A kôsa bo nalé , bôt be nga dañe fulu miel ngule na be bulane kindik ; ve be nji bo ngule ya bo ; amu ôkôse ya mañ ô nga nenenene be. 14 Ajô te be nga loene Jehova, a jô na, bi aye'elane wo, a Jehova, bi aye'elane wo na, te kañese na bi jañ amu ényiñe môťe nyô, te ve bia mekua ya metyi me ne te bijô ; amu wo, A Jehova, ô boya aval ane w'anye'e. 15 Nalé ate be nga bete Jonas, a wua nye mañ été ; Ane mañ me nga jô'é ayaa dé. 16 Ane bôte bete be nga dañe ko Jehova woñ ; ane be nga tyi'i Jehova jôm, a tiñete nye metiñ.

17 Ane Jehova a nga kôme beta kose ya mine Jonas ; aneJonas a nga tabe abume kos môse mila a melu mela.

**2** 1 Eyoñ éte Jonas a nga ye'elane Jehova Zambe wé a to abume kos été. 2 Ane a nga jô na,

Me nga loene Jehova amu me nga yene abé, ;

Ane a nga yalane ma ;

Me nga yôn me to abum ya Sheol été,

Ane ô nga wô'ô tyiñe jam.

3 Amu ô nga wua me édo'o si, ézezañe mañ été,

Ane ndôn é nga bomane ma ;

Mintyôa miôé mise a beta mintyôa miôé mi nga yandane me yôp.

4 Ane me nga jô na, Be vaaya me mise môé ;

Ve m'aye beta fômbô mfa'a ya Temple wôé ane étyi.

5 Mendim me nga bômane ma, ja'an akekui nlem ;

Edo' é nga bômane ma ;

Bilo'o bi nga yametane me nlô.

6 Me nga ke mfa'aya beta minkôle si ;

Si é nga dipe ma a beta mimfeta'a mié melu mese :

Ve ô vaaya ényiñe jam ébé si, a Jehova Zambe wom.

7 Eyoñ nsisime wom ô nga wu me nyôl été, me nga simesane Jehova ;

A meye'elane mam me nga kui vôm ô to ; Temple wôé ane étyi été.

8 Ba b'asimesane mame ya momo me ne minsos ;

Mbe bete bali'i mvame jap.

9 Ve m'aye tyi'i wo biôm a tyiñe ya mveane akéva ;

M'aye ya'an jôm me nga tiñeti.

Nyian ô ne jôme Jehova.

10 Ane jehova a nga kobô kos, ane é nga yo Jonas kindik.

**3** Ane Jehova a nga kobô Jonas a kobô baa, a jô na, 2 Kôlô'o si, ô ke Ninive, beta nlam ate, a kate wô mejô m'aye kate wo. 3 Nalé ate Jônas a nga kôlô si, a ke Ninive, aval ane Jehova a nga jô. Ninive a mbe étua beta nlam, môse mi dulu mila. 4 Ane Jonas a nga taté suan nlam nté dulu ya môse wua, ane a nga yotan, a jô na, a li'ya môse mewôm menyin, wôna Ninive a ye tyamban.

5 Ane bôte ya Ninive be nga buni Zambe ; ane be nga jô na be bômbô zaé, a jaé minkuta, ataté bôt be ne biwôlô akekui ayôme bôt. 6 Ane foé éte é nga kui be njô bôte ya Ninive, ane a nga kôlô éto njô bôt jé, a vaa ngômesane jé nyô, a jaé nkuta, a tabe asup été. 7 Ane a nga lôme tyiñ a kate foé Ninive ase atiñe njô bôt a bôt bé be ne дума, a jo na, Te ke môt nge tit, nge mbam biyem nge mintômba, é tye'e jôm ; be bo te di bidi, nge nyu mendim. 8 ve be jaé minkuta, bôt a betit bebaane, a be dañe ye'elane Zambe ; ya be tame kôñelan, môt ase a li' mbia zene wé, a mame ya évô me ne mo mé. 9 Za a yem nga Zambe a ye bo te kôñelan, a jôban, a kôñelane a jô'é abui ñyaane dé, ane bi a ye bo te jañ ? 10 Ane Zambe a nga yene mimbôane miap, ane be nga kôñelane a li' mbia zene wop ; ane Zambe a nga jôban abé a nga jô na, a ye bo be ; ane a nga bo te bo de.

**4** Ve Jonas a nga dañe wô'ô abé, a yaa ? 2 Ane a nga ye'elane Jehova, a jô na, M'aye'elane wo, A Jehova, ye jame di e nji bo jame me nga jô, éyoñ éte me ngenan si jam ? Ajô te me nga bo avôle ya mate a ke Tarsis ; amu me nga yeme na, ô ne Zambe a ne mvam, a nkoane bôt énoñngo, a te ji'a yaa, a mvam abui, ô wô'ô jôban abé. 3 Ajô te éyoñe ji, A Jehova, m'aye'elane wo na, nyoñe' me ényiñe jam ; amu a ne me mvaé nge m'awu, sa na m'ayiñ. 4 Ane Jehova a nga jo na, ye wo bo mvaé ane w' ayaa ?

5 Ane Jonas a nga kolô nlam, a ke tabe si mfa'aya jôp d'atô'ô nlam, a lôñ ébem vôm ate, a tabe je si éjijin été, akekui a ye bo ngule ya yene jam d'aye bo lam ôte.

6 Ane Jehova a nga bo ndek, a kôme je é faa Jonas nlô yôp, nalé éjijin j'aye bo nye nlô yôp, a nyii nye mfa'a ya mbia éto wé. Nalé ate Jonas a nga dañe yene mvaé amu nde'e éte. 7 Tyé kpwa'a , éyoñ tyé é nga lendé, Zambe a nga kôm ékukum, nje éte é nga di nde' éte, ane nde' é nga viele. 8 A nga bo na , éyoñ jôp é nga tôô, Zambe a nga kôm évuñulu é ne ayôñ é so'o mfa'a jôp d'atôô ; ane jôp é nga faé Jonas nlô yôp, ane a nga ku som, a sili mfa'a wé na a wu, a jô na, A ne me mvaé nge m'awu, sa na , m'anyiñ. 9 Ane Zambe a nga jô Jônas na, Ye wo bo mvaé ane wo yaa ajô ndek ? Ane a nga jô na, M'abo mvaé ane ma yaa akekui awu. 10 Ane Jehova a nga jô na, O nga simesane ndek, nje ô nga bo te bo je ésaé, nalé fe te bo je ngule ya fa'a ; nje éte é nga faa alu da, a wu alu da : 11 ye me nji yiane simesane Ninive, beta nlam ate, nnye ate bôt be to a dañe toyini ntet a toyini mewôm mebaé, mbe bete be ne te yeme kandé mbo nnôme wop a mbo ngale wop, nalé fe abui biyem ?